



10-03-2022

UPA 2022/121

Naqqiut

Naqqiut 14. februar 2022-meersoq taarserpaa.

Naqqiummi siunnersummi taassisutissap allaqqasuan oqaaseqatigiit allanngortinneqarput.

Uanngaak:

"Inatsisartut aalajangiiffigisassaattut siunnersuut Naalakkersuisut peqquneqassasut, nalunaarusiusasut meeqqat 18-nit inorlugit ukiullit kinguaassiuititigut atornerlunneqarsimasut, taakkunanullu angajoqqaajusut/akisussaasut, tarnip nakorsaanik piaartumik ikiorserneqarnissamik periarfissaqalernissaannik pisinnaatitaaffeqalernissaat. Misissuineq periuserineqarsinnaasunik saqqummiussisussaq piviusunngornissaanullu pisariaqartinneqartunik takussutissiisussaq, tamatumani aningaasatigut allaffissornikkullu kingunissaanik, kingusinnerpaamik EM2023-qarnerani Inatsisartunut tunniunneqassaaq.

(Inatsisartunut Ilaasortaq Anna Wangenheim, Demokraatit)"

Imatut:

"Meeqqat 18-nit inorlugit ukiullit kinguaassiuititigut atornerlunneqarsimasut, taakkununngalu angajoqqaajusut/akisussaasut, tarnip nakorsaanik piaartumik ikiorserneqarnissamik periarfissaqalernissaannik pisinnaatitaaffeqalernissaat pillugu nassuiaasioqqullugit Naalakkersuisut peqquneqarnissaannik Inatsisartunut aalajangiiffigisassatut siunnersuut. Misissuineq periuserineqarsinnaasunik saqqummiussisussaq piviusunngornissaanullu pisariaqartinneqartunik takussutissiisussaq, tamatumani aningaasatigut allaffissornikkullu kingunissai ilanngullugit, kingusinnerpaamik UKA2023-qarnerani Inatsisartunut tunniunneqassaaq.

(Inatsisartunut Ilaasortaq Anna Wangenheim, Demokraatit)"

10 Marts 2022

UPA 2022/121

Inatsisartut ingerlatsinermut maleruagassaasa § 33 tunngavigalugu Inatsisartunut ukuninnga aaliangiiffigisassatut siunnersuuteqarpunga::

Meeqqat 18-nit inorlugit ukiullit kinguaassiuititigut atornerlunneqarsimasut, taakkununngalu angajoqqaajusut/akisussaasut, tarnip nakorsaanik piaartumik ikiorserneqarnissamik periarfissaqalernissaannik pisinnaatitaaffeqalernissaat pillugu nassuiaasioqqullugit Naalakkersuisut peqquneqarnissaannik Inatsisartunut aalajangiiffigisassatut siunnersuut. Misissuineq periuserineqarsinnaasunik saqqummiussisussaq piviusunngornissaanullu pisariaqartinneqartunik



**takussutissiisussaq, tamatumani aningaasatigut allaffissornikkullu kingunissai ilanngullugit,
kingusinnerpaamik UKA2023-qarnerani Inatsisartunut tunniunneqassaaq.**

(Inatsisartunut Ilaasortaq Anna Wangenheim, Demokraatit)

Tunngavilersuut

Ukiuni kingullerni meeqqat inuuusuttullu kinguaassiuutitigut atornerluisarnermut akiuiniarneq immikkut sammineqangaatsialernikuovoq. Tamanna pisariaqarluinnarpooq, maanimi Kalaallit Nunaanni kisitsisitigut takussutissaatigut annilaarnarluinnarmata. 2021-mi meeqqanut atornerluisimanerit 257-it saqqummiunneqarsimapput. 2020-mi suli amerlanerusimallutik tassa 338¹.

UKA 2021-mi aamma Inatsisartut tamarmiullutik isumaqatigiissimavoq, meeqqanik kinguaassiuutitigut atornerluisimasut pineqaatissinneqartarnerisa annertussusaa qaffannissaanut. Demokraatinuit isumaqaraluarpugut suli qaffasinnerusinnaasoq, kisiannili una siunnersuut sammisavarput, eqqugaasimasut qanoq ikiorsersinnaanerlutigit. Eqqugaasimasut eqqugaasimasullu qanigisai ikorneqarnerat annikippallaarpoq. Tamanna allanngortittariaqarparput, ajroq kaaviaartoq allanngortinniarutsigu.

Politiit qujaffigerusuppakka, ukiuni kingullerni paasisitsiniaanikkut annertuumik suliaqarsimaneranik, meeqqat inuuusuttullu atornerluinernik nalunaaruteqartarneranut siuarsataasimasumik, taamaasillunilu kisitsisit qernertuusut annertuseriarsimallutik. Tamanna ilutigalugu oqartariaqarpuq eqqugaasimallutik nalunaaruteqarsimasut ikorneqartarneri naammangerujussuarmata. Tamanna Politiit pisuussutiginggaat. Eqqugaasimasut ikorneqarnissaanut akisussaasut tassaapput Naalakkersuisut aammalu maani Inatsisartut.

Politikkeritut inatsimmik allannguisinnaanermut pissaaneq tigummivarput. Taamaattumik inatsisiliortariaqarpuq oqaatsigut isummagullu aallaavigalugit, taamaattumillu eqqugaasimasut ullumikkormit illersorneqarnerat nukitorserneqarnerillu pitsaanerulersittariaqarparput. Ersarissumik oqaatigalugu Demokraatinuit isumaqarpuq eqqugaasimasut piaartumik tarnikkut ikorserneqarnissaat pisinnaatitaaffigilertariaqaraat, tarnikkut ikorseeriaatsit assiginngitsuusut periarfissaalersinnerisigut, taamaasilluta eqqugaasut qanigisaasullu tarnikkut nappaateqalersnerat millisarniarlugu – ajornerusumillu PTSD pigilissanngikkaat.

Tarnikkut napparsimanerit PTSD-lu inuk inuunermeri sinnera malissinnaavaa peqqissutsimut inuunerinnermullu ajorseriartitsisumik.

Meeqqamut eqqugaasimasumut angajoqqaajusut/akisussaasut tarnikkut ikorserneqarnissamut periarfissaq assinganik pisinnaatitaaffigisariaqarpaat, assinganimmi tarnikkut anniaateqarsinnaammata tupaqqallutillu aammalu iliuusissaarunnermik peqartarmata meeqqatik killissamik qaangiinermik misigisaqartinneqarsimagaangata. Ilaat ima kamaammeqqatigisinnaasarput, nammineq iliuusissaminik kinguneqartitsisarlutik, tamannalu assersuuteqartumik takussutissaqareerpugut iliuusissaarunnermik kingunilimmik nammineq iliuuseqartoqarsimaneranik. Ingerlatseriaaserput imaatsillugu eqqugaasimasut arlaannilluunniit iluamik inuuleqqinnissamut ikorserneqapallassimannginnerinik pissutsit taamaattut

¹ Tigulaariffik: Politimester Bjørn Tegner Bay allaaserisami "Kinguaassiuutitigut atornerluineq: Sapaatip akunneranut nalunaarutigineqartartut tallimat" AG normu 2, 2022



pilersartut ilumoorsinnaanngilaq. Ilumoorsinnaanngilarlu ukiuni kingullerni oqallinneq ima kinguneqartassappat kanngutsaatsuliorsimasoq kisimi inatsisitigut ikiorneqarnissaa sammineqassalluni. Kingullertigummi maani Inatsisartuni pineqaatissiarnermut inatsi allangortitersimavarput kanngutsaatsuliorsimasut kanngutsaatsuliornermiit aniguinissaannut ikiorserneqarsinnaanngorlugit suliaqartarsimalluta². Uani naak eqqugaasimasut pisinnaatitaaffiat? Eqqugaasimasut ikiortariaqarpavut, tarnip nakorsaanut ikiorneqarsinnaanngorlugit ersarivimmik inatsisiliussaagut, suliniaqatigiit, suliniutit pilersaarusalлу isumaginninnerup ataaniittut, KILLILIISA inissismaffiani kisimi ikiorniarsariinnarnagit. Eqqugaasut amerlasuut annertuumik ikiugassaasaput, taamaattumillu isumaqanngilagut suliniutit eqqaaneqartunut innersuussiinnarneq naammanngittooq.

Tarnip nakorsaanik ikiorserneqarsinnaanerup unammillernartuisa annertuut ilagaat maani nunatsinni tarnip nakorsaanik amigaateqarnerput. Tamanna ajornarpoo – aamma Naalakkersuisunut – kisitsisinik eqqortunik tunngavilersussallugu³. 2019-mi Red Barnet eqqoriaasimavoq meeqqat inuuusuttullu pineqartillugit unammilligassanut tarnip nakorsai pisariaqartinneqartut 150-iussasut. Tamanna isumaqarpoq maani nunatsinni tarnip nakorsai 100-jut amigaatigigut⁴.

Tamannali malitsigisaanik isumaqanngilaq uagut politikkip tungaaniit unammilligassat aaqqinniarsarissanngikkigut. Demokraatit pingaruteqarluinnartutut isigaat, meeqqat kinguaassiuutitigut atornerlunneqarsimasut tarnip nakorsaaniit piaartumik ikiorserneqapallassasut.

Ataqqivara tamannarpiaq paassisutissaateqannginneq tunngavilersuutigalugu Naalakkersuisut missingiummik saqqummiussisinnaanngimmata aningaasatigut allaffissornikkullu kingunissat suunersut, eqqugaasut aammalu angajoqqaat/akisussaasut piaartumik tarnip nakorsaaniit ikiorserneqapallannissaminut pisinnaatitaaffeqalissappata⁵. Taamaattumik siunnersuutigaara aallarniutaasumi nalunaarusiortoqarnissaa, ilaatigut aporfik manna ersarissartikkumallugu. Nalornissautigineqanngilluinnassaaq uummatiga tamakkerlugu kissaatigigakku eqqugaasut aammalu angajoqqaat/akisussaasut piaartumik tarnip nakorsaaniit ikiorserneqapallannissaminut pisinnaatitaaffeqalernissaat, tamannalu piaartumik piviusunngornissaa sukataarutigissavara.

Oqallinnissaq aammalu partiit aaqqiissutissatut siunnersuutissaat aammalu Naalakkersuisut akissutissaat qilanaaraakka, suleqatigiinnissamullu eqqugaasut pisinnaatitaaffitsigut qulakkeeqqanissaannik aaqqiissutnik ujartuissalluta, ullumikkormit pitsaanerusumik.

Pisortanut aningaasatigut allaffissornikkullu kingunissai

Nalunaarusiassamat siunnersuutigineqartumut aningaasartuutissat atorfiliup ukiumut sularisartagaasa qaangernissaat naatsorsuutigineqanngilaq.

Namminersorlutik inuussutissarsiuteqartunut aningaasatigut allaffissornikkullu kingunissai
Soqanngilaq.

² UKA 2021/157

³ https://ina.gl/documents/para3637/2019/svar/187_2019_psykologer_AQOS_akissut.pdf

⁴ <https://knr.gl/kl/nutaarsiassat/tarnip-pissusaanik-ilisimasallit-amerlasuut-amigaataapput>

⁵ https://ina.gl/documents/para3637/2022/svar/033_2022_retskrav_psykologhjaelp_ANWA_akissut.pdf



DEMOKRAATIT
DEMOKRATERNE

**Innuttaasunut aningaasatigut allaffissornikkullu kingunissai
Soqanngilaq.**